



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Komisija za vanjsku trgovinu i carine

Broj : 01 /3-011-750/01

Sarajevo, 20.11.2001.

Z A P I S N I K

**sa 8. sjednice Komisija za vanjsku trgovinu i carine
Predstavničkog doma Parlamentarne skupštine BiH,
održane 20.novembra 2001.godine**

Sjednica je počela u 9.00 sati.

Sjednicom je predsjedavao Tihomir Gligorić, predsjedavajući Komisije.

Sjednici su prisustvovali: Ibrahim Đedović, Emina Začiragić, Senad Šarganović i Omer Filipović.

Neprisustvovanje sjednici opravdao je Ljubomir Kovačević i Ramiz Vilić.

Sjednici nisu prisustvovali Mirko Baković i Zoran Spasojević.

Ispred Vijeća ministara BiH - predlagača Zakona sjednici je prisustvovala Sena Hatibović, pomoćnik ministra vanjske trgovine i ekonomskih odnosa.

Za sjednicu Komisije je predložen i usvojen sljedeći

D N E V N I R E D

1. Usvajanje Zapisnika sa 7. sjednice Komisije
2. Razmatranje Prijedloga zakona o slobodnim zonama u Bosni i Hercegovini i predloženih amandmana na Zakon o slobodnim zonama u Bosni i Hercegovini

3. Izbor drugog zamjenika predsjedavajućeg Komisije
4. Tekuća pitanja.

Ad-1

Zapisnik sa 7. sjednice Komisije za vanjsku trgovinu i carine usvojen je bez primjedbi.

Ad-2 Razmatranje Zakona o slobodnim zonama u Bosni i Hercegovini i predloženih Amandmana na Zakon

Predsjedavajući Komisije je istakao da je Vijeće ministara na sjednici održanoj 23.10.2001. utvrdilo novi tekst prijedloga zakona o slobodnim zonama u BiH i 14.10. 2001. dostavilo ga u parlamentarnu proceduru s prijedlogom da se razmatra po hitnom postupku na osnovu člana 104. Poslovnika Predstavničkog doma, a ranije dostavljeni tekst Zakona koji je na Domu usvojen u prvom čitanju na 9. sjednici održanoj 6.06. 2001. povuklo iz procedure.

Izmjene i dopune zakona u odnosu na raniji tekst odnose se na: član 4, član 5. stav 2. član 13. stav 1. i član 31. stav 1.

Ispred predlagača uvodne napomene o Zakonu dala je Sena Hatibović, pomoćnik ministra za vanjsku trgovinu i carine napomenuvši da su primjedbe i sugestije Međunarodnog monetarnog fonda ugrađene u tekst Zakona a odnose se na navedene članove.

U raspravi su učestvovali: Emina Zaćiragić, Omer Filipović i Tihomir Gligorić.

Nakon obavljene rasprave o principima Zakona Komisija je jednoglasno zaključila da su načela predloženog zakona utemeljena na odredbama Ustava Bosne i Hercegovine, te da je Zakon potrebno donijeti.

Komisija je razmotrila predložene Amandmane poslanika Branislave Ferzanović na zakon koji glase:

Amandman I

Član 5. mijenja se i glasi:

“1. U slobodnoj zoni mogu se proizvoditi robe i pružati usluge, obavljati vanjskotrgovinski promet, promet roba na veliko i trgovina na malo za devize, te obavljati bankarski i drugi finansijski poslovi, poslovi osiguranja imovine i lica i poslovi reosiguranja i vršiti turističke usluge.

2. U slobodnim skladišnim kapacitetima unutar zona može se uskladištiti i domaća roba koja nije namjenjena izvozu, pod uslovom da se posebno evidentira i da smještaj te robe ne otežava kontrolu poslovanja u slobodnoj zoni.

3. Korisnik slobodne zone može u slobodnoj zoni osnovati vlastitu ili mješovitu banku i osiguravajuću organizaciju, odnosno filijalu banke ili osiguravajuće organizacije u skladu sa propisima BiH i Republike Srpske (u daljem tekstu: entiteti)

Amandman II

Član 13. mijenja se i glasi:

“1. Osnivanje slobodne zone je ekonomski opravdano ako se na osnovu priloženog elaborata o ekonomskoj opravdanosti osnivanja slobodne zone i drugih priloženih dokaza može ocjeniti da će vrijednost robe koja se izvozi iz slobodne zone iznositi najmanje 50% ukupne vrijednosti proizvedene robe koja napušta slobodnu zonu u periodu tri uzastopne godine. Vrijednost robe se utvrđuje na način predviđen čl. 24 do 27 zakona o carinskoj politici.

2. Carinska uprava entiteta preko carinskog organa koji vrši nadzor u slobodnoj zoni, dostavlja Ministarstvu svakih šest mjeseci izvještaj o ispunjenju uslova iz stava 1.

3. Ministarstvo prati izvještaj carinskih uprava entiteta o ispunjavanju uslova propisanih u stavu 1., dostavlja godišnje izvještaj Vijeću ministara i predlaže potrebne mjere.

4. Ministarstvo je obavezno u roku od 30 dana od dana podnošenja zahtjeva dati svoje mišljenje o ispunjavanju uslova iz stava 1. i 2. i uputiti ga Vijeću ministara.

Amandman III

Član 31. mijenja se i glasi:

“1. Vijeće ministara na prijedlog Ministarstva, donijet će rješenje za prestanak rada slobodne zone, ukoliko se utvrdi da vrijednost robe, koja napušta slobodnu zonu sa carinskog područja BiH u periodu od tri uzastopne godine, padne ispod 50% od ukupne vrijednosti robe utvrđene na način predviđen članom 24. do 32. Zakona o carinskoj politici. Uprava carina dužna je o tome obavijestiti ministarstvo.

2. U slučaju iz stava 1. Slobodna zona prestaje sa radom najkasnije u roku od godinu dana od dana donošenja rješenja o prestanku rada slobodne zone.

3. Dozvola za rad slobodne zone može biti oduzeta, ako osnivač ili korisnik ne uvažava uslove za poslovanje koji su propisani zakonom ili prestanu razlozi i uslovi na osnovu kojih je dozvola bila izdata.”

Amandman IV

Član 35. mijenja se i glasi:

“1 U skladu sa Zakonom o carinskim prekršajima entiteta, kaznit će se za prekršaj korisnik i osnivač slobodne zone, ako: bez odobrenja nadležne carinarnice izuzme robu iz slobodne zone; onemogući pregled robe koja ulazi, napušta ili ostaje u slobodnoj zoni i onemogući lični pregled ili pregled prevoznih sredstava koja ulaze ili izlaze iz slobodne zone; kao i za sve ostale poslove koji su suprotni odredbama Zakona o carinskoj politici.”

U obrazloženju predloženih amandmana se navodi da se njima stimulišu ulaganja i proizvodnja u narednom periodu, omogućuje se dalja promocija stranih ulaganja putem slobodnih zona u BiH.

Komisija se o svakom predloženom amandmanu izjašnjava pojedinačno. Jednoglasno (sa 5 glasova za) nije usvojila Amandman I, II, III i IV iz razloga što su amandmani u suprotnosti sa principima Zakona. Njihovim usvajanjem dozvolio bi se promet-proizvodnja na malo što zakon ne dozvoljava.

Zaključeno je da se u Izvještaju Predstavničkom domu predloži usvajanje Zakona o slobodnim zonama u BiH, a za izvjestioca na sjednici Doma imenuje se predsjedavajući Komisije.

Ad-3 Izbor drugog zamjenika predsjedavajućeg Komisije

Po treći puta se odlaže izbor drugog zamjenika predsjedavajućeg Komisije iz razloga neprisutnosti člana Mirka Bakovića koji bi po odredbama Poslovnika Predstavničkog doma iz reda hrvatskog naroda trebao biti izabran.

Zaključeno je da predsjedavajući Komisije obavi razgovor sa Baković Mirkom i da na narednoj sjednici informiše članova Komisije o obavljenom razgovoru.

Ad- 4 Tekuća pitanja

Senad Šarganović je postavio pitanje kada će se obezbjediti investicija za izgradnju carinskog prelaza u Izačiću i kada će carinski prijelaz u Užljebiću biti otvoren.

Senad Šarganović i Omer Filipović su predložili da se uputi dopis predlagaču zakona odnosno resornom ministarstvu u cilju informisanja Komisija o svim dokumentima i materijalima koji prethode utvrđivanju teksta zakona (sa mišljenjem predlagača i međunarodne zajednice) iz oblasti djelokruga rada Komisije kako bi Komisija mogla učestvovati u radu i dati sugestije kod izrade konkretnih akata, istovremeno i se uspostavila bolja koordinacija sa ministarstvom.

Ovaj prijedlog Komisija je privatila kao Zaključak.

Takođe je zaključeno da se uputi dopis Ministarstvu civilnih poslova i komunikacija, Državnoj graničnoj službi, carinarnicama entiteta a kopijom dopisa upozna Ministarstvo vanjske trgovine i ekonomskih odnosa da se članovi Komisije ubuduće protokolarno pozivaju kod otvaranja graničnih prelaza i carinarnica.

Imajući u vidu aktuelnosti koji pokriva segment djelovanja i uređenja carinarnica bilo bi dobro da se članovi Komisije na terenu upoznaju sa funkcionisanjem carinskih službi i o utvrđenom informišu Dom, odnosno Parlamentarnu skupštinu.

Sugerisano je da se članovi Komisije upoznaju sa aktivnostima u određenim evropskim parlamentima u obavljanju vanjske politike s tim da bi predsjedavajući Komisije u tom cilju prethodno trebao obaviti razgovor sa članovima Kolegija Doma.

Sjednica je završena u 10:00 sati.

Sekretar Komisije

Emira Češljarić



Predsjedavajući Komisije

dr. Tihomir Gligorić

